

百年遇

張希婷

- 01 -

海洋無邊無際，好安靜，亦都好寒冷。

過咗幾多日呢……唔係，應該係話幾多年？估計至少都有二百年。我自己一個喺大海漂流咗二百年。對人類嚟講，已經經歷咗起碼兩段人生嘅時間，但係對我咁海妖嚟講，都只係漫長生命裏面嘅十份之一。聽講人類都好嚮往長生不老，但係真正經歷過先會明，咁長命絕對唔係一種享受，簡直係折磨。

唔知幾時開始，我有再數住自己睇咗幾多次日出日落，見過幾多次月圓月缺，海水幾多次潮漲潮退。對我嚟講，每日都係一樣，我只會諗自己所謂嘅漫長壽命，幾時先會結束。

好寂寞。

太陽好似就嚟落山，我合埋雙眼，繼續順住水流飄。

到我再睜大眼嗰陣，發現自己擱淺咗喺一個小島，下身鋪住塊巨型嘅樹葉。坐起身望下身邊，有沙，有石，有樹，有草。

「你終於醒噃？」我聽到聲擰轉頭，有個男人行咗埋嚟。成二百年冇見過人類，我應該講咩好？就



係你哋非法捕獵，搶走咗我嘅家庭同我嘅生活！我可以將對人類嘅仇恨發洩喺佢身上，而且以我擁有嘅魔力，絕對足以令佢從此喺世上消失。

但係，佢冇做過任何嘢傷害我嘅家族。都已經係二百年前嘅事，而家已經同佢無關。

「我叫 Felix。你有冇邊度唔舒服？記唔記得自己叫咩名呀？」

「……」我唔出聲望住佢。

「你個身震晒。」

吓？

「嚟，着住先。」我都仲未答佢，佢已經除咗身上件衫，笠咗落我度。件衫大到可以遮倒我大髀，但係已經爛爛咗，仲有陣好濃嘅海水味。

「跟我嚟吖。」佢伸咗隻手過嚟。

海妖上到陸地，身體就會變成人類。可能因為噉，佢對住我一啲戒心都冇。

「我自己起倒身。」我拍開佢隻手。雙手撐住啲沙，但係對腳完全用唔倒力。都難怪會噉，我已經成二百年冇上過陸地。

「……」再試多幾次都係失敗。

「唔好夾硬嚟啦。」佢講完呢句，即刻伸手攬住



我膊頭，托住我對腳，一下就抱起咗我。

佢個身好暖。記憶中好多人類唔係笑裏藏刀，就係凶神惡煞又冷血，我仲以為佢都係一樣。

結果，我又不自覺合理眼瞓咗一覺，不過今次感覺同以往喺海入面完全唔同。

我發咗個夢…

我夢見我嘅父母，佢哋將我送到上海面就消失咗。岸邊有個人企喺度等緊我。我睇唔清楚嗰個人係咩樣，淨係見倒佢係個生得好高，身體好結實嘅男人。我慢慢游埋去，佢伸手想拉我上岸。掂倒佢隻手嘅時候，我就醒咗。

睜大眼嘅時候發現自己瞓咗喺兩塊巨型樹葉上面，舉高咗隻手俾人握住，見我醒咗佢又鬆番開。隔籬仲有個用樹枝同樹葉起嘅火。

「你冇嘢吖嘛？做咩喊嘅？」係 Felix，佢個樣好似好擔心。

佢講完我先發現自己流緊眼淚。

「冇嘢，發夢啫。」我抹走眼角嘅水漬。

「發惡夢呀？都係嘅，喺個海度浸咗咁耐，真係幾冇安全感㗎，我之前啱啱上岸嗰陣都係嘅。」

之前？到呢一刻我先望住佢。